

MEI 2025 / BIL. 13 / 2025

EON

Epitome of Nature

PENDIDIKAN BERKUALITI



MAJALAH PP BIOLOGI
UITMCNS

ISSN 2773-5869



9 772773 586005

PENDIDIKAN BERKUALITI BERMULA DARI RUMAH

Fauziah Deraman, Noralisa Ismail, Ahmad Izzat Mod Arifin,
Nurnariza Mod Arifin

Fakulti Pengurusan Hotel dan Pelancongan, Pengajian Kejuruteraan
Elektrik, Kolej Kejuruteraan, Fakulti Perakaunan, UiTM Cawangan
Terengganu, Kampus Dungun, Sura Hujung, 23000 Dungun,
Terengganu

fauziahd@uitm.edu.my

EDITOR: NOR'AISHAH BINTI ABU SHAH

Pendidikan berkualiti tidak hanya bergantung kepada institusi formal seperti sekolah atau universiti, tetapi juga bermula dari asas yang dibina di rumah. Rumah adalah tempat pertama seorang anak belajar nilai, norma, dan asas kemahiran yang membentuk keperibadian serta pandangan hidup mereka. Di rumah, ibu bapa merupakan pendidik utama dan yang paling mempengaruhi kehidupan seorang anak. Ibu bapa perlu memastikan anak-anak diajar nilai-nilai murni seperti kejujuran, hormat, dan tanggungjawab. Bimbingan moral dan teladan yang baik melalui tindakan dan kata-kata yang baik juga sangat penting kerana anak-anak biasanya akan mengajuk perbuatan ibu bapa.

Selain itu, persekitaran rumah yang kondusif perlu ada untuk menyokong pembelajaran. Ibu bapa perlu menyediakan ruang khas untuk belajar. Ruang yang disediakan perlu mempunyai pencahayaan yang mencukupi, peralatan pembelajaran yang sesuai, dan suasana yang tenang.

Memastikan suasana rumah tenang dan harmoni dapat membantu anak-anak fokus dan membina rasa selamat dalam diri mereka. Pendidikan berkualiti juga merangkumi pembentukan akhlak mulia dan nilai murni. Rumah adalah tempat terbaik untuk mendidik anak-anak tentang adab, hormat-menghormati, kejujuran dan tanggungjawab. Ibu bapa juga perlu melibatkan anak dalam tugas harian seperti memasak, berkebun, menguruskan kerja-kerja rumah atau mengurus kewangan keluarga bagi mengajarkan kemahiran praktikal dan tanggungjawab dalam kehidupan.

Membaca juga merupakan jambatan ilmu dan asas kepada pembelajaran sepanjang hayat. Justeru, ibu bapa perlu memupuk minat membaca di dalam diri anak-anak sejak kecil dengan memperkenalkan bahan bacaan yang sesuai. Ibu bapa juga digalakkan untuk meluangkan masa membaca bersama anak. Membeli bahan-bahan bacaan ilmiah dan meletakkan semua bahan

bacaan ini di satu sudut di rumah dapat membantu menaikkan semangat membaca dikalangan anak-anak khususnya dan seluruh isi rumah secara amnya.

Dalam era digital, teknologi boleh menjadi alat pendidikan yang berguna sekiranya digunakan dengan betul. Ibu bapa perlu mengawasi penggunaan gajet dan memastikan anak-anak menggunakan teknologi untuk tujuan pembelajaran. Pengawasan ibu bapa sangat penting bagi memastikan anak-anak menggunakan gajet dengan disiplin. Dalam memastikan pengawasan dapat dijalankan dengan



Gambar 1: Asas didikan agama perlu dimulakan dari kecil (Sumber: Koleksi peribadi penulis)

berkesan, ibu bapa perlu tegas dalam peraturan yang telah ditetapkan. Ibu bapa perlu sedar bahawa penggunaan gajet tanpa kawalan akan memberi kesan yang buruk kepada anak. Penggunaan gajet yang berlebihan bukan sahaja memberi kesan buruk kepada perkembangan pembelajaran anak, ia juga memberi kesan buruk kepada kesihatan tubuh badan anak terutama mata.

Ibu bapa juga perlu meluangkan masa berkualiti bersama anak bagi membantu membina hubungan yang erat dan dapat memupuk semangat pembelajaran. Ini termasuk mendengar pandangan dan pertanyaan anak tanpa menghakimi. Anak-anak selalunya sangat suka bertanya kepada ibu bapa sekiranya perkara tersebut menimbulkan tanda tanya dalam diri mereka. Kadang kala soalan yang sama ditanya berulang-ulang oleh si anak sehingga mereka berpuas hati.

Dalam hal ini, kesabaran dalam melayani setiap pertanyaan mereka sangat perlu dan jawapan yang diberikan perlulah bersesuaian dengan umur anak-anak. Ibu bapa juga boleh berbincang tentang isi-isu semasa bersama anak atau berkongsi pengalaman harian mereka untuk membina pemikiran kritis. Kecaknaan ibu bapa dalam aktiviti harian anak-anak mampu memberi sokongan emosi yang baik kepada mereka. Sokongan emosi dan motivasi juga merupakan asas untuk pembelajaran yang berkesan.

Ibu bapa perlu memberikan kasih sayang dan perhatian untuk membina keyakinan diri anak. Selain itu, ibu bapa juga perlu menjadi sumber motivasi terutama apabila anak menghadapi cabaran dalam pembelajaran.

Pendidikan agama juga penting sebagai panduan hidup yang baik. Contohnya, sebagai seorang muslim, ibu bapa bertanggungjawab bagi

,memastikan anak-anak mendapat didikan agama yang cukup sebagai panduan hidup dan juga sebagai bekalan mereka di akhirat nanti. Setiap anak dilahirkan di atas fitrahnya dan diumpamakan seperti kain putih yang perlu dicorak dengan baik. Menjadi tanggungjawab ibu bapa untuk mencorakkan kehidupan anak-anak menjadi yang terbaik.

Maka dengan ini dapat dilihat gambaran pendidikan yang pertama sememangnya bermula dari ibu bapa di rumah. Sekiranya asas-asas pendidikan ini dapat dilakukan dengan sempurna, maka anak-anak akan lebih mudah dididik di luar rumah setelah mereka memulakan sesi pendidikan formal di sekolah dan universiti. Dengan peranan aktif ibu bapa dan persekitaran rumah yang positif, anak-anak dapat membesar menjadi individu yang berjaya dan bertanggungjawab. Pendidikan di rumah adalah pelaburan terbaik untuk membina masa depan yang cemerlang.